

徐侍郎集目錄

卷上

賦

奉和聖製喜雨賦

詩

奉和聖製早度蒲關應制

畫殿侍宴應制

侍從游溫泉宮

奉和聖製答二相出雀鼠谷

奉和喜雪應制

送王判官



送呂補闕西嶽勒碑

送丹陽採訪

題襄陽圖

程將軍夫人挽詩

一

卷下

文

授席豫尚書右丞相等制

除裴耀卿黃門侍郎張九齡中書侍郎同平

章事制

授王翼殿中侍御史等制

貞順皇后哀冊文

大唐正議大夫使持節易州諸軍事守易州
刺史兼高陽軍使賞紫金魚袋上柱國田公
德政之碑并序

附錄

本傳

進徐安貞中書侍郎制

唐會要

雲溪友議

郡志二則

經徐侍郎墓

九峰山詩

尋九峰書院

徐尚書安貞贊

徐侍郎集目錄

徐侍郎集卷上

唐中書侍郎集賢院學士徐安貞撰

賦一首

奉和聖製喜雨賦

惟大君之執象襲先帝之重玄體至精而御物用明德而動天自乘春兮當暑洎三時而不雨何陰陽而併隔瞻雲漢以延佇而雍州之積高乃神明之舊府君告有司無作淫詞圖應龍兮何召望愚婦兮何期禦僭伏之六沴唯蕩蕩之上帝信天道之悠哉固人事之所制爾其園壇方墀環以禁林拂瑤席兮列神座藉白茅兮推聖心却華蓋而特立當赫曦之正臨

幽應如響明徵在今油然作雲鬱山川之氣淒兮爲
雨變天地之陰乘空離合烟霏霧雜散影微微清神
不稀無雷電之相迫但蕭條而自飛迴颯灑於天聽
襲清涼於御衣如泰嶽之朝下似陽臺之暮歸林禦
增飾城池共色八水清田千門紫極洗原隰於龍鱗
拂薨標於鳳翼伊萬物之同潤况油油之黍稷匝寰
海而爲期指咸霖而一息吾君乃升玉堂闢金殿既
滌炎暑是開清宴聽金石之克諧知神人之合抃濟
濟三事稽首而言効靈夔之鼓舞聯振鷺而飛翻欣
復夏王之膳無邀漢后之恩微臣束紳國史秉筆階
祀仰宸儀之法度聞天譔之宮徵大舜之慶雲已發

武帝之秋風莫比欽豐歲之餘裕願先天之至理陋
星斗之占冠靈臺之紀猶誠奢靡之事信明明天子
詩十首

奉和聖製早度蒲關應制

仙掌臨秦甸虹橋關晉關兩都分地險一曲渡河灣
路得津門要時稱古戍閑城花春正發岸柳曙堪攀
後乘猶臨水前旌欲換山長安迴望日宸御六龍還

畫殿侍宴應制

校文常近日賜宴忽昇天酒正傳盃至饗人捧案前
玉堦鳴溜水清閣引歸烟共惜芸香暮春風度幾年
侍從游溫泉宮

神女調溫液年年侍聖人試開臨水殿來洗屬車塵
煖氣隨明主恩波決近臣靈威自無極從此獻千春
奉和聖製答二相出雀鼠谷

兩臣初入夢二月扈巡邊碣北寒猶在山南春半傳
頌聲先奉御辰象復回天雲日明千里旌旗照一川
柳陰低輦路草色變新田還望汾陽近宸游自杳然

奉和喜雪應制

西宮齋祭近登臨雨雪紛紛天晝陰祇爲輕寒無瑞
色頓教正月滿春林蓬萊北上旌門暗花萼南歸馬
跡深自有三農歌帝力還將萬庾答堯心

送王判官

明月開三峽花源出五溪城池青壁裏烟火綠林西
不畏王程促惟愁僊路迷巴東下歸棹莫待夜猿啼

送呂補闕西岳勤碑

聖作西山頌君其出使年勒碑縣日月驅傳接雲烟
寒盡函關路春歸洛水邊別離能幾許朝暮玉墀前

送丹陽採訪

郡縣分南國皇華出聖朝爲憐鄉棹近不道使車遙
舊俗吳三讓遺風漢六條願言除疾苦天子聽謳謠

題襄陽圖

盡得襄陽郡依然見昔游峴山思駐馬漢水憶迴舟
丹壑常含霧青林不換秋圖書空咫尺千里意悠悠

程將軍夫人挽詩

琴瑟調雙鳳和鳴不獨飛
正歌春可樂行泣露先晞
環珮聲猶在房櫳夢不歸
將軍休沐日誰勸着新衣

侍郎集卷上

徐侍郎集卷下

文五首

授席豫尚書右丞相等制

門下朝散大夫使持節鄭州諸軍事守鄭州刺史上
柱國席豫等早升清近備經推擇或政成大郡或績
佇中朝可以秉於樞轄正之僕御副於內府亞以尹
京恪恭迺職允茲休命可依前件

除裴擢鄉黃門侍郎張九齡中書侍郎同平

章事制

勅風雲之感必生王佐廟廊之任爰在柱臣中大夫
守京兆尹護軍借紫金魚袋裴擢鄉含元精之休體

度弘遠正議大夫前檢校中書侍郎集賢院學士仍副知院事上柱國賜金紫魚袋曲江縣開國男張九齡挺生人之秀器識通明並風望素高人倫是仰可
以協彼寅亮當茲啓沃幹時待士既資鼎實之和為國急賢寧惟金革之事擢卿可黃門侍郎同中書門下平章事弘文館學士散官勳如故張九齡可起復中書侍郎同中書門下平章事兼修國史餘如故主者施行開元二十一年十二月

授王翼殿中侍御史等制

勅朝議郎行監察御史王翼五從弟朝請郎行監察御史級等咸以貞固爰司察視驟聞舉宜亦旣懲奸

歲月增深昇遷有叙並可殿中侍御史

貞順皇后哀冊文

維開元二十五年歲次丁丑十二月庚子朔七日丙午惠妃武氏薨于興慶宮之前院移殯春宮麗正殿之西階粵翌日乃命有司持節冊謚曰貞順皇后以旌德飾終也洎明年春二月己亥朔二十二日庚申將遷座于敬陵禮也啓攢塗於春禁候重門於初旭轉靈衛於金根緬哀懷於上國亦旣有命銘于貞王其詞曰

風之始者 備內職選才淑政兼翊戴化錫丕祉繁華鍾美我天后之從孫周桓王之季子于渭之溪

重開戚里鸚鵡飛翔珮玉鏘鏘自莘野而三命乃率
先於鴈行出言有章彤管有光孝慈之心諒自天啓
鞠育孫幼恩流愷悌七子既均六宮有禮貴主三分
於外館賢王兩闢於朱邱彼陰教兮惟微承日月之
光輝輔聖人之至德故動用而無違驪谷湯泉天行
慕律屬車之汭陪遊之日孰謂蕩邪茲焉遇疾 焚
香山以邀元吉却屈重城彌留永畢思勿藥之有喜
痛還年之無術嗚呼哀哉覽舊館兮洞開踐芳塵兮
徘徊指甘泉之畫像謂德容之在哉自昔層城之宮
椒風之殿獲遇明主是矜邦媛有平生之渥恩無淪
沒之餘眷况貞順之寵錫伊徃古之莫見中兆考常
嗚呼哀哉

三龜既良園陵蒼蒼在國之陽傍芙蓉而左轉怨桃
李之春芳風卷旌旆繁笳委咽中使護道懿見辭訣
山藏玉衣地留金穴惟清灞之永涘流國風而不竭
嗚呼哀哉

大唐正議大夫使持節易州諸軍事守易州
刺史兼高陽軍使賞紫金魚袋上柱國田公
德政之碑并序

聞之經國濟理長物生人者則必委以郡邑而擇其
良吏然守文則溺於牽俗更法則弊於專任寬恕則
失於容奸強毅則陷於傷善建用皇極難乎其人若
夫剛不爲虐簡而能斷布政優優化人成俗者見於

田易州馬公名琬字正勒其先敬仲適齊因陳爲族
周齊聲近遂氏於田五代其昌罷秦人之西帝七雄
方闢朝泗上之諸侯自國滅淄上族遷關右武安以
戚屬爲丞相司農以建議封陽城吾能言之公其後
也不殄厥問幽而復光曾祖君舒隨甘州刺史祖越
西州長史父惠成州同谷尉名雖必聞官不求達累
濟純嘏克生忠良公應天景星含道元氣和五味以
正性備百行以資身况言談者仁之文孝悌者德之
本取與者事之會恬淡者道之符弱冠游大學尋師
授韓詩曲禮以爲小雅傷於怨刺大戴失於奢侈功
業宜先於濟理章句非急於適時因讀孫吳兵法衛

霍別傳遂仗劍從軍以功授合黎府別將歷果毅轉
折衝累拜郎將中郎將除安北都護稍遷威衛將軍
每拜命必御一官兼一使非其幹理疇克保釐由是
所向皆通衆善咸集戶部尚書王暉國之損幹人之
具瞻太子太師蕭嵩惟嶽出雲生南翊聖王之惣管
朔方也帳下之畫一以詢公蕭之節度河西也聞外
之事不裁於己公貌無矜色口無伐辭出則推美於
人入則盡慮於事議者以爲王能信善蕭能任賢居
二者之間非周才孰可尋以將軍兼靈州刺史朔方
軍節度副使押渾部落仍檢校豐安定遠及十將兵
馬使會遭家艱奔喪州里扶杖未起粥啜不入古之

純孝何以尚茲明年林胡寇邊天子震怒起公除易州刺史鎮北邊也公聞命驚殞以死讓請情既難奪恩為中信廿四年禮終復除易州刺史兼高陽軍使此邦之人舊稱勇悍慄然尚荆鄉之風慕燕丹之義其俗易使也其人可用也而地接邊鄙郡叅軍鎮嗟哉杼軸空矣征役勤矣用非所養力盡猶求摧節義之明心就逋逃之下請公深然其故大過其源阜其財求致其忠愛居者既逸去者知歸星歲未周襁負咸至豈非寬明以恕恩結其心者歟時出桑野奄觀鉅刈責其惰者則怒為怛感如遇其敗子焉勉其勤者則喜形顏色若遇其良子焉故人感而懷之莫敢

暇逸霑體塗足唯農是務所以家粟流行而餘糧棲畝管子曰倉廩實知禮節則公之德政信然也歲或大旱憂心如熏如燠如焚如焚其身曾是勤人達於鬼神及有事山川宜乎冢土祝始告而雲合俎未徹而雨降氣有并隔災變為蝗自西徂東風至雨集其高也散日其下也被地遂能辨其疆界犬牙不入非神鑒其德有以庖之其孰能與於此夫市者利之所聚人之所爭強或肆奪不忌於上吏取於人謂為官市交易不得其所朝夕為之皆虛公撫御多方非止朴罰家僮門客莫出城寺通商服估日以填湊更為一都之會也公下車將大變其俗其有酣歌劍舞者

彈絃跼屐者懾其雄而息其競疏其穢而復于禮以爲不積其德無以服人也不正其身無以出令也故視無旋聽無聳其動也可効其靜也可法四鄰以是嘉其致而歸其高百姓以是服其德而樂其行故自郡邑至于鄉鄙莫不競者讓暴者仁毅者溫懦者立其惟不言而化已過半矣於是詢耆舊察人俗入而靜謀出而周視高者抑之弛者張之人之所惡者去之人之所好者濟之老有歸幼有懷至於疾苦莫不躬親問之一年而下無艱急而亦無殄病矣比及三年則有成也盡知方也洎農隙巡撫煦愉溫顏易水變其寒風燕谷增其煖氣由是刑罰不用而君亦耻

之使無訟乎見於今日矣故化行乎近郡而譽達乎京師公夙昭武烈而善於文史將以漢主憂邊故投其筆硯晉侯擇帥更悅其詩書不然何有執繁弱之弓杖雍紘之戟而能綠飾吏事摘發如神窮物之理盡人之性若此之至也廿七年公次會計於京廿八年春二月制攝御史中丞遷安西都護詔書至郡郡之人吏若有所亡或號門衢或悲里室曰自我公至吾黨其蘇今我公往吾黨其痛詣闕陳情則長安地遠邀道攀戀而西域路絕旣借寇不可則令名宜存詞曰卓爾有立時惟田侯清標遠映高月乘秋其武也剛其文則柔孰是師旅能牧于州靡不夙夜思皇

厥中綢繆庶政亦以訓戎天子曰俞爰加爾功俾守
易土而和其風北燕之南全趙之北歲有軍事人用
不足從而摧之是謂苛慝惟君蒞止高明柔克柔克
伊何撫如嬰孩蝗不入境旱不爲災旣庶能富逋亡
歸來非德之致其誰有哉水積則流德積則揚化自
下國聲馳遐方允矣君子如珪如璋刻石頌之令聞
不忘

徐侍郎集卷下

徐侍郎集附錄

本傳

劉昫

徐安貞者信安龍丘人尤善五言詩嘗應制舉一歲
三擢甲科人士稱之開元中爲中書舍人集賢院學
士上每屬文及作手詔多命安貞視草甚承恩顧累
遷中書侍郎天寶初卒

進徐安貞中書侍郎制

孫逖

門下中樞之要久闕其官仄席而求實難其選中大
夫檢校尚書工部侍郎兼集賢院學士上柱國徐安
貞清才特達雅量深沈爲德行之宗師是文辭之雄
伯頃司水土兼典圖書博綜維精彌綸有叙王言是

屬公議攸歸宜增秩於五字俾齊名於三人可守中書侍郎餘如故

唐會要

王溥

開元中中書舍人張九齡中書侍郎徐安貞迭居翰苑以爲極被恩遇先是八年正月徐楚璧以武陟尉爲分庫檢校九年正月二十八日監察御史宇文融請檢察色役僞濫者因令免使奏舉觀農判官數人而右拾遺徐楚璧在其選楚璧等皆當時名士判官得人於斯獨盛十九年中書侍郎徐安貞等撰文府二十卷上之朝

雲溪友議

徐侍郎安貞久居中書省常參李右丞議恐其罪累乃逃隱衡山岳寺爲東林掇疏行者而喑啞不言者數年後值修建佛殿僧中選善書者題其梁以二三人矣而徐行者跨過掌事怒以杖連擊其背行者乃畫地曰某口雖不言昔年曾學大書也乞試之及試乃題數行群僧皆說服因遣畫書之時李北海邕游岳過寺觀其題處曰不知徐公在此乃召至握手而言曰朝列於公已息論矣遂解其布褐飾以簪裳僧嘗攷鑿者潛匿無地徐謂邕曰吾恐逢非罪跡深山允庸僧輩安能識我汝無疑也江夏公因戲之曰徐侍郎曾吟峴山思駐馬漢水憶廻舟又暮雨衣猶

濕春風帆正開否徐曰喑啞之日亦默誦之因同載
北歸止潭州察使水亭相送徐侍郎指李北海呼曰
行者瀟湘逢故人得隨歸客止乎汀州之隅若幽谷
之觀太陽者矣不然委頓巖谷卒於寺隸也

郡志

徐安貞舊名楚玉字子珍唐會要楚善五言嘗應制
科一歲三上俱及第開元六年以武陟尉選入殿刊
正七年補麗正學士累遷起居舍人賜今名遷中書
舍人內供奉二十年除檢校工部侍郎東海子卒贈
尚書

又

九峰書院在縣東九峰唐尚書徐安貞讀書之所今
故址猶存

經徐侍郎墓作

顧况

不知山吏部墓作石橋東宅兆鄉關異平生翰墨空
夜泉無曉日枯樹足悲風更想幽冥事唯應有夢同
况吳人以著作郎出爲
饒州司戶道出衢州

九峰山詩

趙抃

龍丘石室人難繼安正書堂世莫登但見松蘿最高
處九峰排列一層層

尋九峰書院詩

王瓚

尚書書院修遺踪山勢依然列九峰欲上峰頭憑一

望白雲朶朶照芙蓉

徐尚書安貞贊

袁文紀

龍丘之英南州之彥三應制科咸居首選階超武陟
位列起居生封東海卒贈尚書

徐侍郎集附錄

辛丑正月十日患疾火不能
出戶擁爐圍坐是年元日
大風可撼木致屋瓦三日好教

偶記

清室

